

til hlutaðeigandi sveitarstjórnar. Kæran skal afhent sveitarstjóra, áður en sex vikur eru liðnar frá álagningu fasteingaskatts, og skal sveitarstjórn hafa lokið úrskurði á kærunni innan tveggja mánaða frá álagningu.

11. gr.

Vilji gjaldandi ekki hlíta úrskurði sveitarstjórnar, sbr. 10. gr., getur hann skotið máli sínu til yfirfasteignamatsnefndar. Kærufrestur er tvær vikur frá því að kærandi barst vitneskja um úrlausn sveitarstjórnar.

Yfirfasteignamatsnefnd leggur úrskurð á ágreiningsefnið innan tveggja mánaða frá því að nefndinni berst kæran.

Ágreiningsefninu, sem nefndin hefur lokið úrskurði á, má skjóta til úrlausnar dómstóla.

12. gr.

Fasteignaskattinum fylgir lögveð í fasteign þeirri, sem hann er lagður á, og skal ásamt dráttarvöxtum í tvö ár frá gjalddaga ganga fyrir öllum öðrum veðkröfum, er á eigninni hvíla. Ef hús brennur, eftir að skatturinn er fallinn í gjalddaga, er sami forgangsréttur fyrir honum í brunabótafjárhæð hússins.

13. gr.

Leggja skal fasteignaskatt á þær fasteignir, sem metnar eru í fasteignamati 1. janúar á gjaldárinu, og skal skatturinn miðast við fasteignamatsverð eignarinnar á þeim tíma. Þó skal heimilt á árinu 1973 að leggja skatt á fasteignir, sem rétt var að taka í fasteignamat í ársbyrjun, en láðst hefur af einhverjum ástæðum, enda hafi fasteignamat og álagning skattsins farið fram eigi síðar en 1. ágúst 1973.

Reglugerð þessi er sett samkvæmt lögum nr. 8 22. marz 1972, um tekjustofna sveitarfélaga, til þess að öðlast gildi 1. janúar 1973 og birtist til eftirbreytni öllum þeim, er hlut eiga að máli.

Félagsmálaráðuneytið, 19. desember 1972.

Hannibal Valdimarsson.

Hjálmar Vilhjálmsson.

REGLUGERÐ

um breytingu á reglugerð nr. 118 9. september 1954,
um sölu og veitingar áfengis.

1. gr.

8. gr. orðist svo:

Veitingastað skal heimilt að leggja allt að 26% á kaupverð hans á áfengi, þegar neytendum er selt vín á hálfum eða heilum flöskum, en þegar sala fer fram í minni skömmtum er veitingastað heimilt að leggja allt að 66% á kaupverðið. Áfengis- og tóbaksverzlun ríkisins skal semja verðskrá yfir útsöluverð áfengis á veitingastað, sem gestir eiga aðgang að.

Á verðið eins og það hefur verið ákveðið samkvæmt framansögðu má einungis leggja söluskatt, svo og þjónustugjald, eftir þeim reglum, sem um þessi gjöld gilda.

Áfengisskammtur skal miðaður við 3 cl. Óheimilt skal að nota önnur mælitæki en þau, sem hlotið hafa löggildingu.

2. gr.

Reglugerð þessi, sem sett er samkvæmt áfengislögum nr. 82 2. júlí 1969, öðlast þegar gildi.

Jafnframt er úr gildi felld reglugerð nr. 52 24. marz 1972 um breytingu á reglugerð nr. 118 9. september 1954, um sölu og veitingar áfengis.

Dóms- og kirkjumálaráðuneytið, 20. desember 1972.

Ólafur Jóhannesson.

Ólafur W. Stefánsson.

Nr. 322.

21. desember 1972.

AUGLÝSING

um staðfestingu sjávarútvegsráðuneytisins á greiðsluframlagi fyrir frystar fiskafurðir framleiddar á tímabilinu frá 1. október til 31. desember 1972.

Með skírskotun til laga nr. 72 28. maí 1969, um Verðjöfnunarsjóð fiskiðnaðarins og samkvæmt tillögum stjórnar Verðjöfnunarsjóðs hefur ráðuneytið staðfest eftirfarandi greiðsluframlag úr sjóðnum fyrir frystar fiskafurðir framleiddar á tímabilinu frá 1. október til 31. desember 1972:

	Framl. pr. kg.
Porskur	kr. 9.00
Ýsa	— 5.00
Steinbítur	— 11.00
Karfi	— 14.00
Ufsi	— 11.00
Langa	— 8.00
Grálúða	— 10.00
Heilfr. fiskur	— 4 00

Sjávarútvegsráðuneytið, 21. desember 1972.

F. h. r.

Jón L. Arnalds.

Gylfi Þórðarson.

Nr. 323.

19. október 1972.

REGLUGERÐ

um breyting á reglugerð nr. 143/1967, um iðnfræðslu.

1. gr.

2. gr. breytist þannig, að á eftir orðunum „tágariðun“ komi „tannsmíði“.

2. gr.

4. gr. b. breytist þannig, að eftir orðunum „tágariðun“ komi „tannsmíði“.

3. gr.

Reglugerð þessi, sem sett er samkvæmt heimild í lögum nr. 48/1966, um iðnfræðslu, öðlast þegar gildi.

Í menntamálaráðuneytinu, 19. október 1972.

Magnús T. Ólafsson.

Birgir Thorlacius.